



皇宋十朝綱要卷第十八

眉山李璣編

徽宗

戊戌重和元年

遼主天祚天慶八年
金主阿骨打天輔元年

正月甲申朔御大慶殿受定命寶 己丑大赦 戊

子封皇孫諶為崇國公崇德軍節度使 丙申燕王

淳與女真遇于徽州東陣未合而潰 是月孫羲叟

遣石泉統制种友直討都浪村板舍原兩族平之已

而蕃眾復來攻友直復遣將衡遜擊却之築白沙等

一
章
一十八處

二月癸丑朔環慶路奏夏賊攻濟義原堡將官張迪戰死 先是上用方士之說作神霄九鼎皆賜名御筆差道士三百人赴禮制製造所迎導鼎奉安于上清寶籙宮 庚午遣武義大夫馬政同高藥師等使女真講買馬舊好 丁丑御筆戒諸路監司以御前為名收買上供等物包苴饋獻因為已有 是月孫義叟遣神友直等分兵三路深入討夷賊連破諸族直抵時州馬蹄溪殺戮甚衆

三月丙戌義叟言石泉軍增建兩會等九堡詔並賜名 癸巳詔嘉王楷令赴集英殿試 丙申以繇茂州夷平曲赦四川 戊戌詔蔡京子倬為朝散郎宣和殿待制駙馬都尉尚康福帝姪駙馬都尉帶文階自倬始 戊申御集英殿賜進士及第詔嘉王楷考在第一不欲令魁多士以第二人王昂為榜首

四月癸丑朔涇原築席葦平城廊延路築夫降山城詔賜名靖夏制戎 辛酉用給事中張叔夜言禁門下省諸房書空頭黃 壬戌改永嘉紫芝峯法因院

為紫芝觀賜林靈素 癸亥手詔定徒刑折杖法
丙寅淮南轉運使張根坐論東南諸路闕乏之由遂
及修造之侈賜第錫帶之濫又言花石綱大忤權倖
由是落職監信州稅尋責散官安置郴州 己卯手
詔自今每歲季秋親祀明堂如孟月朝獻之禮
五月壬戌朔日食 丁亥林靈素為通真達靈元妙
先生視中奉大夫 張虛白為通元冲妙先生視中
奉大夫 己亥置經制司於尚書省 癸卯御筆太
湖并長塘湖石令朱勗取發 是月淮南廬壽州賊

平生擒賊首劉五

六月乙卯御筆應天下神霄宮令逐路提舉官主管
戊午追復朝奉大夫范祖禹為徽猷閣待制 己
巳曲赦淮南西路 癸酉譚稹以平劉五功進一官
同知入內內侍省 甲戌以夏人請命扣關曲赦陝
西河東路 御筆天下神霄宮知州帶主管事通判
帶同主管字 己卯朝奉大夫前知峽州王寀資政
殿學士劉昺坐酬倡詩歌謗訕悖道妖訛不道詔寀
伏誅昺長流瓊州

七月壬午御筆以攻破夏人城壘建築城寨宰執並加恩進官 癸未御筆宰臣兼神霄玉清萬壽宮使執政官充副使 熙河路築亂氊嶺新寨賜名制羗 壬辰御筆青華帝君生辰以元成節為名依降聖節例

八月甲寅童貫以築靖夏制戎制羗三城功進太保改封涇國公 御筆天下州府道正令道籙院選差申尚書省出勅仍增副道正一員 辛酉詔史記老子傳陞于列傳之首前漢古今人表叙列于上聖其

舊本並改正 乙丑劉安世任伯雨張庭堅馬消等各復一官差提舉宮觀 庚午詔天下學校諸生添治道家大小一經自今學道之士許入州縣學教養並依見行學法其中選人增置士名自元士至志士凡十品三歲大比許襴襦就殿試 辛未御筆明堂廢中聲之樂止用正聲其已頒中聲樂並令納禮制局改正 是月大遼冊阿骨打為東懷皇帝使至女真以儀物不純用天子之制怒遣還之

九月辛巳大饗明堂

此後更不書

丙戌大學辟雍各遣

差通內經莊列二人為博士 劉五伏誅 庚寅頒

御注老子刻石神霄宮

尋以御注道德經等入道藏

庚子太宰

鄭居中罷持餘服 壬寅林靈素張虛白特授本品

真官免視法 丙戌詔截留上供米四十萬石賑濟

江淮荆浙被水民戶 是月掖庭大火凡焚五千餘

間方火作雨如傾時盛傳是夜上微宿于外云

閏九月辛亥御筆以臣寮言省臺寺監官不才無狀

朋比附會者禮部員外郎張植等凡十九人並差提

點宮觀及監當有差 壬子御筆勾收白地禁權鹽

貨方田增稅權酷增價量收醋息河北加折稅米東

南強糴斛斗等皆搔擾剝削可即日罷 丙寅復行

東北未鹽法罷解鹽舊法 甲子薛昂上神霄帝君

降臨記傳視兩學 戊辰開封府學增置道學博士

一員 乙亥詔諸州亦如之 丙子尚書省言道徒

升貢乞依文士給號紙候唱名初入仕並補志士道

職已上取旨並賜褐服高者依文士從之

十月己卯御筆以紹述熙豐政事書布告天下 壬

辰詔自後知州任滿考課以增誘道學興隆教法整

葺道宮為崇奉之最

十二月應學事官亦依此為課最

癸卯上御

寶籙宮傳度玉清神霄秘籙會者八百人 戊申徽猷閣待制提舉萬壽觀蔡絛勒停

十一月己酉朔旦冬至大赦是歲改元 立道階二十六等自太虛大夫至金壇郎同文臣中大夫至迪功郎立道職十一等自冲和殿侍晨至凝神殿授經同待制修撰至直閣 丙辰以林靈素為冲和殿侍晨 庚申詔復江南諸路提舉坑冶官 先是廣安軍布衣安堯臣上書指斥童貫深結蔡京同納燕人

李良嗣為謀主建平燕之議必啟邊釁言甚切直上以其書送尚書省議大臣乞加竄殛上曰言路蔽塞久矣可重罪哉即命以官 丁丑詔禮制局討論冠服其見服鞞改為履

十二月戊寅朔復京西路錢監 馬政與高藥師等至阿骨打所居阿芝川來流河阿骨打之姪粘罕兀室等^詰結問遣使之由政以實對遂質登州小校王美等六人發渤海人李善慶生熟女真二人散都勃達齋國書并北珠生金貂子等來已卯至登州州遣赴

關 已丑從延康殿學士侍讀徐處仁言置裕民局
於校正所 癸巳手詔蔡偉尚茂德帝姬其父京子
孫十一人內六人白身各補官仍賜紫章服

己亥宣和元年

遼主天祚天慶九年
金主阿骨打天輔二年

正月辛亥上既用處仁議置裕民局蔡京怒處仁不
附已欲罷之侍御史張樸因劾處仁罪出知揚州而
局亦尋罷 乙卯手詔改天下僧寺為觀改佛號為
大覺金仙餘為仙人大士之号僧號德士 丁巳詔
女真使人李善慶散都勃達各補官復遣馬政副朝

議大夫趙有開齋詔書禮物與善慶等渡海徃聘之
至登州而有開死會河北奏契丹已封女真為東懷
帝乃詔馬政勿行止遣平海軍校呼慶持登州牒送
善慶等歸 戊午余深進太宰兼門下侍郎 王黼
為少宰兼中書侍郎 己未改女冠為女道尼為女
德 庚申詔禁銅鑊鈸佛像等悉令納官仍存佛像
添用冠服 辛酉御筆改菩薩羅漢泗州大聖達摩
等稱號 真定府路安撫使趙適奏北賊董才入中
山府界藏汨已下都巡檢將官等逼逐出境 乙亥

躬耕籍田

二月庚辰以籍田禮成改元 改宣和殿為保和殿
丁酉御筆去年十月二十五日傳受祕籙以其日
為天符節

三月庚戌安州孝感縣獲古寶六 童貫逼熙河路
經畧使劉法使北取朔方法不得已引兵出塞至統
安城為賊伏兵所擊法死之士卒陷沒者十萬賊勢
益張乙丑遂進圍震武軍 己巳手詔日食定數之
常令太史奏正陽之月日當蝕宜令有司檢具故實

以聞 是月阿骨打發契丹使蕭習烈楊立忠回要
其稱大金皇帝凡不然則提兵取上京天祚惡聞女
真事蕭奉先揣其意不以聞明年上京破和議遂格
四月丙子朔日食 夏人久圍震武童貫至熙州調
涇原秦鳳兩路兵往援又檄隴右同都護辛叔詹熙
河統制何灌選精銳直趨震武又命蘭州兵深入取
水波蓋朱朴龍三城賊聞救兵大集丁巳解圍去
戊子詔資善堂蕃衍宅各置翊善贊讀直講一員
己亥曲赦陝西河東兩路

五月丁巳御筆應德士並許入道學 是月大水犯
京城有龍出於開封縣前茶肆酒器作坊兵士共磔
食之後十餘日水復大至 西北有赤氣數十道亘
天

六月戊寅呼慶等始至阿骨打軍前阿骨打及粘罕
等責以中輟且言登州不當行牒留之半年至十二
月方遣呼慶等歸明年乃至京師 己卯夏人赴闕
納款謝罪詔答之止六路進兵 甲申封莊周為微
妙元通真君列禦寇為致虛觀妙真君 己丑起居

郎李綱上疏論水災非常乞上畏天戒招來讜言又
乞直前奏事庶盡讜直詔都城水災緣有司失職隄
防不脩即非災異綱所論不當送吏部尋又降一官
與遠小處監當差遣

七月甲寅童貫進太傅山南東道節度使 乙卯觀
大少樂 己未詔童貫領樞密院治事私第日赴內
殿起居 辛酉詔直宣和殿何訢提舉明道宮延康
殿學士河南尹盛章落職提舉鴻慶宮 癸亥詔訢
章並責散官安置訢鼎州章筠州 戊辰徙淮西提

點刑獄俞向於福建路專督捕群盜劉花三等
八月丁酉以神霄玉清萬壽宮成降德音於諸路初
高麗求醫士遣二醫往至是始還詣內東門以及其
事及語錄奏聞然後知實非求醫乃彼知中國將與
女真圖契丹因是勸止中國謂苟存契丹猶足為中
國捍邊女真虎狼不可交也宜蚤為之備上聞之不
樂後三年遣使往聘欲促其共舉高麗雖恭順終不
得其要領而歸

九月丁未移何訖盛章安置新州永州 乙卯曲宴

保和殿過玉真軒蔡京等請見安妃許之京作記以
進 癸亥幸道德院觀金芝由景龍江至蔡京第鳴
鑾堂賜京酒京訴開封尹聶山離間尋坐絀京作鳴
鑾記以進

十月詔河東提點刑獄張宗武等十二人坐為監司
不按吏為臣僚所彈各降兩官 是月開修兔原河
直河

十一月辛亥蔡京乞以神霄玉真王所說玉嬰神變
妙經頒行從之 乙卯祀昊天上帝于園邱大赦

遣監察御史周武仲察訪淮南 太學生鄧肅生進
詩諷取東南花石屏出學押歸本貫

十二月己丑罷提舉人舡所 丙申罷蘇杭溫湖等

州造花局 詔招撫山東道宋江 是月開修兔源

河直河成 是月正字曹輔上書諫微行編管郴州

庚子宣和二年

遼主天祚天慶十年
金主阿骨打天輔三年

正月癸卯丙侍馮浩除名勒停編管永州 中道殺之 詔

蔡確輔立哲宗功在社稷可封郡王賜第一區子懋
除延康殿學士莊除侍郎女及婿皆遷官有差弟碩

落罪籍贈徽猷閣待制 甲子御筆罷道學 丙寅

詔宰執自今依旧法常聚議都堂 是月呼慶等至

京師具道阿骨打所言并其國書達于朝廷時童貫
方受密旨圖契丹

二月乙亥遣右文殿修撰趙良嗣忠訓郎王瓌使金
國仍以買馬為名其實約夾攻契丹取燕雲旧地第
面約不齎國書夾之攻約盖始於此 甲午手詔別

修哲宗正史 乙未詔道德士並不得陳乞作官戶

三月壬寅御筆搜訪王安石遺文 乙未改熙河蘭

樂路為熙河蘭郭路

四月辛未詔寺監官不得獨對 癸酉女真分三路
出師上京 丙子詔江西廣東路權置武臣提點刑
獄路分都監各一員候劉花三賊黨淨盡日罷 己
丑詔以正月四日為基節 癸巳車駕幸蔡京第詔
京八子十三孫四曾孫可並於寄祿官上轉行一官
五月己酉日^中有黑子 庚戌御筆王黼遷入賜第
遣內侍主其事務賜錢綵陳設什物酒果等 壬子
就賜家屬御筵 是月阿骨打攻上京不旋踵而破

趙良嗣奉使至軍前阿骨打令從軍觀攻城 乙卯
詔宗學宗子賜及第出身授官有差 丁巳祀地于
方澤 戊辰陝西復置平貨務令童貫兼領 朱夢
說坐上書論宦寺之權太重編管池州

六月戊寅蔡京守本官致仕依前神霄玉清萬壽宮
使仍朝朔望 癸未御筆諸路保甲並依元豐旧制
京東西路並罷 乙酉罷諸路方田 丁亥詔天下
寺院昨以奸人妄有申請改革作德士宮觀可除大
相國宮外仍舊為寺院 戊子詔安濟居養漏澤之

法有司奉行失當資給過厚可參元豐舊法立為中制 己丑詔內外官司行遣文字在京字作都下可

令止絕 初蓋避蔡京名也 甲午御筆督福建廣南江東路

捕賊劉花三 御筆併罷修書諸局五十八所官吏

詔禮制局製造所併歸書畫局 乙未詔太學辟

雍及諸路州學給食並依元豐法 丁酉止絕監司

守臣進貢物 蘇軾復承議郎龍圖閣待制

七月己亥朔詔武學及小學給食依元豐法醫學依

政和法類試 己酉詔罷宗室不釐務差遣 庚戌

詔道史令道籙院官兼領羗館職道官六員脩纂更

不置局 罷杭州平江府置造所 辛亥江淮湖廣

福建路收抄旁定帖錢令曹司專樁充逐歲糴本

壬子詔自今文臣丁憂非因邊防毋得起復 甲寅

罷大晟府增置按協聲律官 丁巳詔在京小學近

增立三舍法有害鄉舉里選本旨可並依元豐法

己未詔罷在京醫學并算學 辛酉尚書省言近降

旨併罷書局內有未盡者又詔併罷禮房修耕籍條

官吏一十處 詔改明堂頌事為司常頌朔為司令

其頒政不置

八月己巳朔罷神霄玉清使司酒庫錢庫 庚辰詔
鑿官郎以三十員大夫以二十員醫效至伺候以三
百人為額 癸未京東西路提點刑獄武臣罷提舉
保甲 逸林靈素歸溫州 丁亥罷六曹主管架閣
文字官并打套香藥局歸確貨務 癸巳令劉棟歸
隸州 乙未御筆復德士女德為僧尼

九月金國遣錫刺曷魯大廸烏高隨來詔作新羅人
使引見國書申夾攻之議許以燕京地予我却欲得

中國旧來契丹銀絹五十萬之數且言舉兵之後我
不如約則不以已許為定 罷給地牧馬法以民戶

所養官馬給填闕馬禁軍 丙午錫宴于太傅童貫

府第 戊申諸路州路縣召募役人並依元豐法

詔吏職出身人磨勘功賞轉至武功大夫止 庚戌

河北上書人故契丹監鐵使蘇言壽特除朝議大夫

直秘閣 詔併東南北路坑冶司官吏入江淮等路

坑冶鑄錢司 丙辰詔遣登州鈐轄馬政聘金國持

國書及事目隨曷魯等行國書云已遣知樞密院事

童貫勒兵相應請示舉軍的日以憑夫攻所有五代以後陷沒幽薊等州已議收復銀絹依與契丹數目歲交別降樞密院事日付馬政差政之子廣從行丙辰併編估局入權貨務 己未詔河北軍馬與陝西河東軍馬更戍

十月戊辰朔日食 罷諸路帥臣監司增置屬官員缺 閤門祇候劉察生前與廣西路黃麟招徠大理國詐以宜香郡賣馬人李紫琮等為大理國人使入貢除名勒停編管濠州 丙子睦州青溪妖賊方臘

反據幫源洞四出焚掠聚眾幾萬人 癸未罷諸路武士教諭 己丑夏國遣使入貢 丙子方臘起幫源洞殺里正縱兵侵掠 是月馬政等至來流河阿骨打帳前金人以朝廷欲全後山前後故地及故民意皆疑吝留月餘意不決已而復差曷魯及大迪烏持國書來書約云若更欲西京請就便計度收取十一月戊戌方臘僭改元號永樂以其月為正月 己亥余深罷為少傅鎮西節度知福州 丙午改尚書省公相所作都所 庚戌王黼進太宰 立秘書

省官負額 己未兩浙路都監蔡遵顏垣以兵五千
擊方臘不勝死之賊日益衆 乙丑改知青州曾孝
蘊知睦州專一措置捕賊 丙寅方臘陷青溪縣
十二月戊辰方臘陷睦州賊衆二萬殺官兵千人於
是壽昌分水桐廬遂安等縣皆為賊據 己巳罷置
輔郡穎昌開德府鄭州歸元穎路分拱州仍為州
甲申方臘陷林寧縣知縣趙嗣為賊所執脅之使降
嗣罵之賊以嗣宰邑有善政不敢害委之而去 丙
成陷歙州東南將郭師中戰死士曹掾栗先守獄罵

賊遇害於是婺源績溪祁門黟縣等官吏皆逃去後
四日陷富陽 丁亥詔保寧軍承宣使同知入內內
侍省事譚稹提舉措置捕捉睦州青溪賊步軍都虞
候王稟往統制之 戊子方臘陷寧國縣進逼宣州
己丑佑神觀使鄭居中領樞密院事 庚寅手詔
談稹因出使制置捕捉群賊所至察訪事有害民者
悉條畫以聞 庚寅詔自今諸司不得起請方田見
方未方已方而未起稅者並罷 辛卯御筆又罷諸
路拋買科配等 乙未方臘陷杭州知州趙霆遁去

廉訪使者趙約罵賊死 是歲南康軍居住陳瓘移
楚州始王棗得罪瓘自江州移南康及方寇作或為
飛語云瓘女婿已為寇所劫欲加中傷上訖保全之
故卞京黨人皆莫能害

辛丑宣和三年

遼主天祚保大元年
金主阿骨打天輔四年

正月丁酉朔改譚稹為兩浙制置使 癸卯以童貫
為江浙淮南等路宣撫使初方臘起王黼時專政惡
聞有賊且跋督浙西提點刑獄張苑勿張皇生事因
不敢實奏至冬乃不可制遂連陷三州上大恐中都

為震始遣譚稹逗遛不時進及賊入杭乃使童行
時北征事起陝西勁兵多聚輦下因得盡出師上微
行送之 殿前副都指揮起劉延慶充宣撫使統制
諸路兵馬 乙卯方臘陷崇德縣進圍秀州 辛酉
御筆罷收買花石造作供奉之物凡置局去處 罷
蘇杭造作局 甲子王稟等破賊於秀州城下斬首
數千級秀州平 乙丑罷在京營繕局採斫木植收
買物料 御筆脩煉鎮鼎丹及鑄劍鑑並奉安畢通
紗處士沈日休可增兩字供水火守爐二人學生宗

鑑王暉與迪功郎 是月方臘陷婺州又陷衢州守
臣彭汝方死之

二月丁卯禁臣庶於淮南兩浙路般致花石入京
庚午蠲兩浙路被賊民戶公私逋及三年田賦責趙
震散官安置吉陽軍 癸酉罷陝西河東東南木柵
司荆湖南北路採買木植司 戊寅放江浙淮南路
編管及安置人自便命官即與叙復 庚辰宋江犯
淮陽軍又犯京東河北路入楚州界知州張叔夜招
撫之江出降 壬午方臘陷旌德縣 是日金國使

錫刺曷魯大迪烏高隨至登州守臣以童貫討方臘
未還留曷魯等不遣曷魯稍怒欲徒步入京師尋詔
馬政王瓌引詣闕 癸未王稟復杭州 乙酉詔罷
天下三舍太學以三舍考選開封府及諸路以科舉
取士罷宗學辟雍官屬并諸路提舉學事官 丙戌
罷淮南兩浙等路增收一分稅錢及出賣定帖錢
庚寅賊帥仇道人陷刻及新昌縣知刻縣宋旅戰死
壬辰復旌德縣 癸巳以復熙豐舊制大赦 甲
午御筆河北京東路並行鈔監許客人任便通販

劉鎮破賊於烏村灣斬首六百級復寧國縣 乙未
方臘陷處州餘黨陷信州

三月丙戌朔賊犯杭州王稟戰於城外斬五百級又
敗之於桐廬 庚子賊攻越州知州劉鞞擊走之

壬寅賊將呂師囊屠仙居縣 己酉官軍復歙州賊
攻台州不克解圍去 庚戌官軍復睦州 辛亥賊

再圍台州不克 統領劉鎮揚可世破賊於潘村

癸丑譚稹奏復轉猷倉自泗州始 甲寅復婺州

丙辰復富陽縣 丁巳復新城縣 戊午復桐廬縣

辛酉劉光世破賊於大塘 壬戌王稟復睦州

是春日有變忽青黯無光其中洶々而動若鈔金而

湧沸狀日旁有青黑正如水波周回旋轉將暮而稍

正 丁卯劉光世破賊復衢州

四月戊辰呂師囊破台州通判李景淵擊走之 前

知睦州張徽言長流萬安軍 甲戌詔罷諸路見任

官帶管勾學事 詔前青溪知縣陳光以盜發所臨

棄城先走杖死 丙子劉光世復龍遊縣 丁丑賊

陷天台黃巖兩縣 己卯劉光世復蘭溪縣 郭仲

荀復上虞縣 辛巳劉光世復婺州 壬午詔廣西
成都潼川夔州路帥臣監司相度併省新建築州縣
童貫以中軍駐杭州 癸未王稟復青溪縣 丁
亥姚平仲復浦江縣 甲申罷荆南鼎豐兩路復為
荆湖北路 戊子劉鎮揚可世王稟諸將合兵四道
並進至幫源洞夾擊之賊二十餘萬衆腹背旅拒轉
戰至晚兒徒糜爛流血丹地斬獲逾萬人 方臘竄
去 庚寅生擒臘於幫源上東北隅石澗中并其妻
孥兄弟偽相侯王三十九人振旅赴杭州 詔梁師

成下使臣鄧宏曹組特令就殿試賜同進士出身

五月甲午朔姚平仲復義烏縣破偽天仙洞斬首甚
衆獲僭偽等物 戊戌劉光世復壽昌縣破月溪洞

己亥詔杭越江寧府守臣並帶安撫使 癸卯追

冊明節和文貴妃劉氏為明節皇后 睦州為嚴州

歙州為徽州 乙巳郭仲荀復嵯縣新昌縣 丙

午金國使曷魯大迪烏入國門詔國子司業權邦彥
內侍童師禮館之未幾師禮傳旨邦彥曰大遼已知
金人海上往還難以復如前議諭曷魯大迪烏令師

邦彥驚曰如此則失其懽心曲在朝廷矣師禮復奏復傳旨候童貫回議之二使留闕下凡三月餘丁未劉光世至靈山洞破賊於鳳池谷斬一千六百餘級斬賊首胡將祝將招安偽繆二大王等四萬五千八百餘人來降庚戌姚平仲破求日新洞殺日新焚其巢穴王黼言新知蘄州陳過庭為御史中丞日輒上言乞應係御前委使之人一切盡行廢黜朝散大夫張汝霖為京西漕日公違格令更不歲進花果無享上之心甲寅詔過庭汝霖並散官安置過

庭黃州汝霖歸州乙卯楊惟忠復東陽縣

閏五月丙寅裁定諸州所增置曹掾官壬申改譚

稹制置捕捉睦賊所為淮南江浙路制置使甲戌

王黼奏特置應奉一司詔從之仍令黼總領於外梁

師成總領於內丁丑詔江浙殘寇留譚稹置措俟

庶事按堵乃可赴闕壬午詔依條合應奉及被旨

專委或御前差官幹當者即不廢罷詔申明行下

癸未御筆客人監鈔每貫量收工墨錢充應奉司御

前支用丙寅姚平仲等提兵五千破仙居縣界招

賢四十餘洞於是楊惟忠王渙梁安平劉光世等兵
破洞斬獲皆有功而偽方五相公偽七佛等衆屢敗
賊餘黨氣益衰

六月己亥姚平仲破賊金像等三十餘洞 辛丑辛
興宗與宋江破賊上苑洞姚平仲破賊石峽口賊將
呂師囊棄石城遁走擒其偽太宰呂助等 癸卯命
江淮轉運司陳遇經制兩浙江東路江淮荆浙福建
諸司財計聽遇取用監司州縣官聽遇按察 是月
河決恩州 契丹副都統耶律余覲擁千餘騎并骨

肉車帳叛歸女真 是夏洛陽京畿忽有物如人或
如犬其色黑不能辨眉目夜出掠小兒傷食之蓋黑
昔云如是二歲乃息

七月庚午御筆三京置女道籙副道籙各一員 戊
子江浙淮南等路宣撫使童貫等俘方臘以獻臘之
起破六州五十二縣戕平民二百餘萬王師自出至
凱旋凡四百五十日

八月甲辰御紫宸殿受百官賀降德音於江浙福建
淮南等路 童貫加太師進封楚國公譚稹常德軍

節度使 壬子金國使曷魯大迪烏辭遣呼慶送歸
國書止付曷魯等不復遣使 丙辰方臘伏誅

九月壬午御筆鎮江平江府守臣並帶本路兵馬鈐
轄 乙酉手詔童貫開疆辟國殄滅姦兇殊勲昭著
二子師錫師禮可特除遙郡觀察使

十月丙辰上御寶籙宮神霄殿親授王黼等元一六
陽神仙秘籙

十一月戊寅詔禁師事胡法造墓捨身令道籙院頒
行 壬午罷太府寺增置丞一員 乙酉詔脩汴都

志 是月金攻遼中京曷魯等自海上歸至其國阿
骨打得書意朝廷絕之令其弟國相勃及烈并粘罕
兀室等悉師渡遼而西用降將余覲為前鋒趨中京
十二月庚戌御筆道官左華郎以下並視文階選人
今有見帶職者可依文臣選人除職改京官例並與
改丹臺郎 是歲諸路蝗

壬寅宣和四年

遼主天錫建福元年
金主阿骨打天輔五年

五月壬戌賜王黼御盃雪令於得賢治定閣寶藏
癸酉金人破遼中京

二月庚子承事郎勾管太平觀陳瓘卒

三月辛酉幸秘書省次幸太學省官學官加恩有差
是日上御右文殿既罷復賜輔臣以下凡五十二
人御書 始天祚在燕聞女真引兵駐松亭古北口
即出居庸關聞余覩將至即奔雲中又自雲中奔夾
山 壬申開封尹王革奏甘露降王黼第乞拜表稱
賀從之 丙子詔諸路提舉神霄宮監司發遣有道
行天心正法及拜章有應驗道士逐路三兩人赴道
錄院 遼人立耶律淳為天錫皇帝改元建福廢天

祚為湘陰王以燕雲平中上京遼西為六路燕王主
之沙漠以北西南西北面兩路都招討府諸蕃部族
天祚主之猶稱保大二年自此國遂分矣 金人引
兵至雲中留守蕭查剌與都轉運使劉企常開門出
降 戊子天錫遣使持礼物來告謝上以天祚尚在
夾山燕王安得擅立令雄州却回之代州奏准大金
彰國軍牒本國軍馬已到山後平定州縣于是命童
貫為河北河東路宣撫使勒兵十五萬巡邊降詔喻
蔡京管内軍民 是月戊戌童貫啟行上微出北郊

齋宮餞之 己亥賜遼國歸明人董才姓名曰趙翊
族部千餘人賜爵有差 丙午手詔求遺書於天下
辛亥童貫駐軍高陽關 是月高麗國主侯薨在
位三十八年世子楷嗣

五月丙寅命少保開府儀同三司蔡攸為河東河北
路宣撫副使以河陽節度使劉延慶為河北東西兩
路都統制 乙亥蔡攸發京師童貫駐軍于雄州陝
西兵稍集以統制种師道總東路之衆屯白溝統制
辛興宗統西路之衆屯范村並聽劉延慶節制 遼

主天錫遣耶律大石林牙并蕭曷魯領奚契丹軍一
千五百餘騎屯涿州又遣蕭幹統常勝軍二萬餘人
抗我師 戊寅大軍陳於白溝 癸未我師敗于蘆
溝甸 丙戌又敗于白溝

六月庚戌我師退保雄州於是童貫以為契丹尚盛
未可圖劾和詵候益探報不實妄請興師乞行軍法
上聞師敗甚惧遂詔班師遣諸將分屯 辛亥遼主
天錫耶律淳病卒遼人立國妃蕭氏為皇太后權主
軍國事改建福元年為德興元年

七月壬戌遣給事中路允迪中書舍人傅墨卿使高麗 戊辰御筆禁進納為道士者 辛巳童貫蔡攸回軍駐河間貫攸既敗事相持而哭但招集亡潰與保雄州而已忽知中山府唐度奏耶律淳死燕人皆以契丹無主願歸土朝廷王黼立主再興師之議於是悉諸道兵二十萬以劉延慶為都統期九月會三關詔貫攸無歸異議者斬于是伐燕之議成矣 詔种師道責授右衛將軍致仕和詵散官安置筠州 八月阿骨打追襲天祚于國崖戊戌大戰生擒契丹

都統蕭規天祚脫身走及夏國引兵數萬襲天德軍阿骨打遣偏將帥師七千擊之值秋霖水暴至夏人溺死不可勝計阿骨打既勝兵驍氣銳遂因秋成並邊牧馬休兵屯奉聖州之東

九月詔熙豐政事悉自王安石建明其家淪替可賜第一區孫棣除顯謨閣侍制曾孫、女轉官加封號有差 詔朝散郎宋昭上書狂妄除名勒停編管海南初師行即詔妄議北事者必罰無赦執臣廷臣皆無一語獨昭上書言其不可遂坐之 乙丑金國通

議使孛堇烏歇高慶裔等入見初金國緣朝廷遣曷
魯大迪烏等歸不遣使疑吾有謀兼又未嘗先報師
期轍進兵取中京移軍白水泊襲破天祚行帳既占
雲中府山後州縣忽聞童貫舉兵阿骨打與群酋議
恐爽約自我或南朝徑取燕則歲賂不可得遂專遣
使來上待烏歇等甚厚賜予不貲至輟御茗調膏賜
之引登明堂入龍德宮蕃衍宅別築離宮無所不至
禮過契丹數倍而慶裔渤海人桀黠知書雖外為恭
順稱恩頌德而屑求故例不已 甲戌命徽猷閣

待制趙良嗣充大金國信使閣門宣贊舍人馬廣副
之 戊寅契丹易州守將高鳳等以易州降遣統制
何灌將兵援之 己卯契丹都管押常勝軍涿州留
守郭藥師以涿州降 甲申契丹太后蕭氏遣使上
表稱臣 乙酉克易州

十月庚寅改燕京為燕山府 癸巳劉延慶統大軍
與郭藥師等出雄州入新城趨涿州 甲午御筆改
山前九州軍名 是日契丹使蕭容韓昉持太后表
至宣撫司即日飛奏童貫蔡攸視副本止云納款稱

臣麾而去之須納土乃受昉等笑曰納款即納土也
虜種類謀未諳國朝禮當思兩全毋貽後日之悔
丙申詔知中山府詹度知燕山府知襲慶府錢伯言
知涿州左司員外郎知易州權邦彥 辛丑詔山前
收復州縣以燕山府路為名 壬寅以陳遇為燕山
府路都轉運使 甲辰劉延慶次涿州 丁未以收
復涿易二州 癸丑以復燕山府御紫宸殿受百官
賀 詔河東河北宣撫副使蔡攸判燕山府 初劉
延慶自涿州次良鄉行兩日至溝盧河駐軍用郭藥

師計命藥師及諸將趙鶴壽高世宣楊可世可弼將
兵五千襲燕城至三家店 藥師遣將甄五臣率常
勝軍五千騎奪迎春門以入大軍繼至時城中契丹
及奚兵尚衆我師已騷所至紛然肆行剽掠與虜巷
戰屢敗藥師失馬幾為虜所獲後走至迎春門縋城
而下可世等從之夜奔安次縣收潰兵入涿州高世
宣戰歿翌日蕭幹渡河挑戰延慶軍中洵惧 甲寅
遂焚營而遁衆軍大潰軍中輜重金帛凡朝廷竭國
力經營北事者所備悉為虜得 上始知藥師但跳

十朝綱要 卷十八
城入燕尋已退遁而延慶師潰 手詔責貫攸等曰
吾今不復信汝矣

十一月丙辰朔頒行新璽 庚午祀昊天上帝於圜
丘大赦 趙良嗣馬廣等至奉聖州金人以議燕京
事未決留馬廣從軍遂以國書授良嗣遣李董李靖
復來王度刺副之撤盧柵充計議使 丙子到闕
許我以燕京及六州二十四縣之地

十二月自劉延慶退師之後蕭幹累陷諸縣是日復
圍永清縣藥師領常勝軍擊之幹大敗退保燕京

戊子李靖王度刺等辭詔龍圖閣學士趙良嗣顯謨
閣待制周仲武為國信使副兼送伴 童貫蔡攸再

舉取燕不能下惧無功獲罪密遣王环由飛狐路禱

國金主令圖之且言兵已壓燕境不敢擅入乞如約

夾破 辛卯金人入燕太后蕭氏出奔宰相左企弓

虞仲文等皆迎降翌日金國主遣馬廣歸朝廷捷

丁酉蕭后至松亭關於是契丹從太后與太石林牙

歸天祚天祚殺蕭后赦林牙奚人與渤海軍從蕭幹

入奚後僭号稱神聖皇帝改元天嗣

蕭幹即蔓離石也

丙

申劉延慶責授率府致仕安置筠州 庚子詔道官
立法已同文階可編入襍境壓仍遇郊封贈父母
甲辰女真復遣李靖王度刺持國書與趙良嗣周武
仲同來國書云燕京用本朝兵力攻下其州縣租稅
並當本朝受納又不許平營灤三州以副本示良嗣
良嗣以為不可乞削去租稅事粘罕曰燕京自我得
之賦稅自當歸我若不見與請速追涿易之師無留
吾疆

癸卯宣和五年

金主吳乞買天會元年

正月戊午李靖王度刺等入見 己未詔趙良嗣周
武仲復使金國馬廣為計議官許以每歲別交銀絹
以代燕京暨六州租賦 辛酉詔尚書左丞王安中
為慶遠軍節度使知燕山府武寧軍節度使郭藥師
加檢校少保同知燕山府 癸未金人遣趙良嗣等
歸不復遣使止以國書赴良嗣來於歲幣外邀代稅
一百萬緡且許以古口歸我惟平營灤三州不許
二月丙戌趙良嗣周武仲馬廣自燕山回至雄州以
金國書自迤馳奏金人以議未合自南使過盧溝後

十朝綱要 卷十八
悉斷橋梁焚次舍 庚寅復遣良嗣等自雄州再至
大金軍前悉如其請 乙卯金國遣寧朮割王度刺
撤母房來入見以誓書草來請依草立誓 己未詔
遣吏部侍郎盧益及趙良嗣克國信使副持國書及
誓書往金國軍前議交燕京日月 良嗣與寧朮割
皆言虜許還西京且求犒軍物二十萬而國書并誓
書乃一無語及西京者蓋良嗣與寧朮割共為欺罔
卒啟兵端

四月初益良嗣等奉誓書往使至涿州兀室等先索
誓書觀之斥字畫不謹屢却回令至京師易之益等
諭以主上親御翰墨示尊崇大國之意猶不聽凡改
更三四朝廷皆曲從之又索歸明職官趙溫許等良
嗣赴宣撫使司取溫許等執送之粘罕釋其縛而用
之甲午始遣楊璞與虜益趙良嗣以誓書來且索米
二十萬碩 戊申入見 丁酉以撫定燕山府等路
合用物貨諸路漕臣急切計置 庚子童貫蔡攸入
燕山府燕之金帛子女職官民戶悉為金入席卷而
東朝廷指歲幣數百萬所得者空城已 庚戌河北

河東燕山府

路辛亥童貫蔡攸自蔡山府班師

五月己未以收復燕雲兩路御史德殿受群臣賀

庚申王黼進太傅鄭居中太保執政官各進一官

辛酉王黼總治三省事 丁卯瀘南安撫使奏溪州

田才順等納土 癸酉祭皇地祇于方澤 是月金

國主阿骨打卒弟吳乞賈立改元天會

六月丙戌知平州張毅遣人 詣安撫司納土詹度

密以聞 金人聞毅叛遣闍母國王將二千騎來討

毅迎拒于營州金人以兵少不交鋒而歸大書州門

有今冬復來之語毅妄以大捷聞 甲午朱勔以燕
山之役馳傳有勞為寧遠軍節度使醴泉觀使 乙
巳蔡攸領樞密院事

七月戊午加起復太尉河東燕山府路兼河北路宣
撫使譚稹為檢校少保始童貫蔡攸歸自燕山頗失
上意王黼梁師成共薦稹為宣撫使令駐河東專交
割金人所許山後雲中府朔武蔚應等州然金人實
未嘗以其地與我也稹既至太原會金國主殂未暇
治山後故朔武蔚應等州守將韓正等皆通款于我

云 己未太師兼領樞密院事童貫致仕 甲子中
書省言福建路印造蘇軾司馬光文集詔令毀板今
後舉人傳習元祐學術者以違制論 庚午王黼表
上皇帝尊號曰繼天興道敷文威武睿明皇帝詔不
允凡三上表并內外群臣皇子鄆王以下太學諸生
耆老等上書以請者甚衆皆不從

八月辛巳朔翰林天文局言日當食不食乞副史館
詔北界歸朝官願就鎖廳試者令轉運司收試
乙未王師大敗故遼將葭離不于峯山斬獲三萬級

生擒阿魯太師獲耶律德光尊號寶檢契丹塗金印
葭離不遁去尋為其部下所殺傳首河間府葭離不即

蕭幹也

辛丑命王安中以平燕之功封上刊石是月

燕山府路轉運使呂頤浩坐嘗奏燕山急危五事詔
頤浩所奏意有包藏落職降官

九月癸丑詔知河間府蔡靖與同知燕山府詹度兩
易其使始任朝廷命王安中知燕山府藥師同知繼
又命詹度同知然藥師恃常勝軍之強日益橫甚安
中不能制唯諂事之度屢奏藥師難保朝廷以其交

十朝綱要 卷十八
惡益深故兩易之初常勝軍止二千人後增至五萬
良械精仗莫不以給配之其後兵數愈增

中國雖有戍兵唯九千人無能為也又
藥師及燕人終不改其左衽亦無如之何時人竊比
之安祿山云 癸亥蔡條坐撰西清詩話專以蘇軾
黃庭堅為宗特落職勒停

十月壬寅詔諸路奉行常平法令廢弛令中書省具
諸路提舉常平官進呈汰其不職者自周審言以下
凡一十五人

十一月癸卯詔國子監刊御德冲虛至德真經南華
真經頌之學者 丙寅辛王黼第觀芝草又由便門
過梁師成家復來黼第駐驛因大醉黼自出傳旨支
賜放散侍從百官於是禁衛爭願見上始謝恩不肯
散因大洩 師成與譚稹扶上出撫諭之後入夜漏
上五刻乃鑿龍德宮複道小墻以過內侍十數人執
兵接擁而還是夜幾生變翌日上深悔之 丁卯詔
同知燕山府郭藥師遷太尉藥師日益驕恣上疑焉
因別築第都城增賜美女諭令來朝藥師辭以故不

至 初張穀遣其弟來通款朝廷遂授穀泰寧軍節
度使世襲平州仍以金花棧御筆付其弟令面授穀
金人謀知之以千騎襲破平州穀挺身走遁燕山郭
藥師留之匿姓名寄常勝軍中金人盡得朝廷所賜
詔并御筆自是歸曲朝廷累檄朝廷司取穀朝廷初
不欲發遣知燕山府王安中言必不發遣懼啟兵端
不得已令安中縊殺之函首送金人

十二月甲寅葭離不傳首京師 乙巳金人始遣
使來賀正旦 是月譚稹奏常勝軍恣橫乞于河東

別招一軍分其權勢優其廩餼號義勝軍所招凡五
萬人

甲辰宣和六年

金主吳乞買天會二年

正月乙卯手詔為金國主計至輟視朝五日遣使慰
問 乙未詔置提舉措置書藝所生徒以五百人為
額 癸亥詔以葭離不首級送太社頭庫 戊寅遣
太常少卿連南夫為金國吊慰祭奠使武略大夫張
撝副之仍詔南夫至金國趣交割西京應奉聖等州
二月己亥手詔躬耕藉田 丙午詔自今非歷省臺

寺監、司、郡、守、開、封、府、曾、官、不、得、為、郎、官、卿、監、著、為、
令、宰、執、有、服、親、及、戚、里、應、仕、進、者、遵、熙、豐、故、事、與、
宮、祠、

三月郭藥師言常勝軍多潛投義勝丙子詔常勝軍
無得至關南 丁巳復置提舉陝西市易務官金人
遣使詣宣撫司索所許糧二十萬斛譚稹不與金人
怒及舉兵終以此為詞云

閏三月乙未手詔申嚴元祐學術之禁 詔大名尹
徐處仁知沿州柳瑛措置河北盜賊 是春東都地

震後三月又震宮中殿門皆震動作声蘭州地及諸
山草木悉沒入而山下麦田乃在山上朝廷遣右司
郎中黃潛善按視潛善不以實聞上意遂安潛善尋
為戶部侍郎

五月壬寅罷經撫房

六月詔京東西河北路起燕雲免奉錢 壬子詔江
淮湖廣四川諸路並起免夫錢 甲子詔衝改元豐
法制以大不恭論

七月戊寅御筆非授籙人不得服星文冠裳禁民庶

十朝綱要 卷十八
倡優以五嶽等官施于首飾 甲申夏人犯朔武令
陝西五路師臣嚴備 是日著作佐郎許元宗廣西
路廉訪使者董緒為賀金國嗣位使副元宗等至金
國來流河虜首悉用契丹舊礼見之 壬寅御筆諸
路調夫以供邊計應宗室后妃戚里宰執之家及宮
觀寺院雖特旨免科者一例均敷 甲辰置討論製
造璣衡所以宰相王黼總領內侍梁師成副之

八月初朔州韓正應州蘇京蔚州陳詡各以州來降
積輒受之金人怨朝廷納張毅又不給所許糧二十

萬斛遂攻陷蔚州等殺陳翊逐蘇京等絕山後之議
朝廷咎積指置棄方落檢校少傅以本班節度使提
舉崇福宮尋責散官致仕 又詔童貫落致仕依前
領樞密院事河東河北燕山府路宣撫使殿中御史
許景衡論貫罪惡已試無效 乞別謀良帥丁巳
熙河路築滋溢機堡賜名定羗城庚申景衡送吏部
壬戌以復燕雲兩路大赦天下

九月乙亥門下侍郎白時中為太宰兼門下侍郎
尚書左丞李邦彥為少宰兼中書侍郎 庚寅手詔

以金芝產于良嶽萬壽峯改名壽嶽 辛卯手詔蘇軾黃廷堅誣毀宗廟義不戴天片文隻語並令焚毀勿存如違以大不恭論 丙申御筆今後道官表奏及道官差除令進奏院報行 府州築錢爐城莊領堡丁首賜名震威寧羗

十月丙午提舉崇慶宮劉安世復直龍圖閣 辛亥高麗夏國遣使入貢 庚午手詔吏部侍郎王時雍御史中丞何臬中書舍人韓駒俱蘇軾鄉黨曲學時雍臬出提舉崇福宮駒太平觀時雍臬尋落職 壬

申內外官並以三年為任

十一月丙子太傅楚國公致仕王黼仍旧神霄萬壽宮使 乙酉罷應奉局 丙戌置講議司 御筆差領樞密院事蔡攸同白時中李邦彥同講究利害條畫來上 是月童貫遣馬廣辛興宗使黏罕軍月未至雲中府會粘罕已歸國留兀室權元帥以責庭參礼卒不相見使高慶裔傳言詰納于張穀等事違誓書而已廣歸告貫以虜情不測乞速營邊備不貫能用

十二月甲辰朔手詔近命近弼置司講議太師致仕
蔡京可兼領講議司聽就私第裁處以稱貴老貪賢
之意 甲辰龍圖閣直學士知成都府王復等九人
坐王黼親黨落職降官罷黜有差 癸亥太師魯國
公致仕蔡京落致仕領三省事五日一赴朝請至都
堂治事 手詔河北河東流移尚多盜賊未殄令本
路提點刑獄文臣徧行撫諭宣布實惠 是時都城
有賣賣^青果男子孕而誕子又有酒保朱氏女忽生髭
長六七寸疏秀甚美宛然一男子特詔為道士 蔡

京復領三省童貫欲經畫收復雲中以奏議來上京
主其說尚書右丞宇文粹中對以虜誓有俟挈天祚
五年後徐議之說恐今興兵則啟釁端其議遂已
是歲河北河東盜起擁衆七八萬凡數千上遣內侍
梁方平帥兵討捕之

乙巳宣和七年

金主吳乞買天會三年

正月癸酉朔遣朝散大夫李遵奉議郎朱定國齎親
書手詔撫諭河北京東盜賊唐鄧汝願流民釋囚蠲
賦及凡料歛逋負等 庚寅御筆魏伯芻動搖鹽法

十朝紀事 卷十八
落徽猷閣待制 癸巳手詔並罷常平提舉官屬
是月故遼主天祚自夾山奔小骨帳為金人所擒降
封海瀕王送長白山東築城居之踰年而卒自是遼
國遂亡

二月甲辰詔頒劉知常所造神霄金寶輪于天下
御筆置諸路提舉坑冶官 復熙豐以來旧鑄銅錢
諸監 乙巳獲契丹慶歷誓書王黼率百官賀 戊
申詔改鹽法盡旧監別行新鈔 壬子改舉提香鹽
為提舉茶鹽公事 丙辰罷京東弓箭社

三月臣僚言傳墨卿孫覲以下六人皆坐元祐曲學
並宮祠 辛丑賜蔡條進士出身 是月童貫自太
原真定瀛莫入燕山犒常勝軍奏河請北置四總令
招逃卒及刺游手之人為軍

四月詔蔡靖知燕山府應結絕宣撫使司及國信司
職事並專一行遣 壬子復居養院 詔蔡條罷侍
讀追毀賜出身敕 初蔡京再領三省未幾日昏不
能視事、皆決於子條、威福自任同 列皆不能
堪 庚申復命京致仕 廢大觀庫 復州縣免行

錢 丁卯蔡條勒停前戶部侍郎韓招坐協助條竊
權撓政責散官安置黃州戊辰今後三公不許統領
三省

六月辛丑朔詔內外宗室依照法由宜並著姓 丙午童
貫以平燕功進封廣陽郡王 壬戌講議司言視官
非元豐官制紊亂名實蠹耗國用詔罷並之 甲子
御筆罷諸應奉官 丙寅裁減六尚歲貢物百二十
有三品

七月庚午朔河東義軍叛據隆德府黎城縣河東將

郝瑒戰死 熙河地震有裂數十丈者蘭州尤甚陷
數百家倉庫俱沒河東諸郡或震或裂 不

八月壬寅燕山府奏金人以歲賜銀絹低次 不肯
受

九月丙戌著作郎楊時兼崇政殿書說 壬辰金國
以天祚成擒遣渤海王李孝和永福來告慶是日至
國門其實虜將舉兵先使覘我也時河東奏黏罕至
雲中經營南寇童貫再行宣撫詔貫未即行會知太
原府張孝純奏金人遣小使至欲見貫議交割雲中

地上頗信之詔貫趣行無留 是月有狐由良嶽直
入中禁據御榻而坐詔毀狐王廟

十月壬寅中山府奏女真國相與余覩率兵來蔚州
及蔚柳甸內大集兵將入寇

十一月壬午詔無出身待制以上年及三十通歷任
滿十歲乃許任子 先是童貫至太原遣馬廣辛興
宗復詣雲中使黏罕既至趣廣等庭參廣等力爭不
可得皆拜之如見阿骨打禮黏罕責以違誓書納張
穀等事遂決意入寇 丙戌上祀昊天上帝于圜邱

大赦

十二月戊戌朔金人破檀州己亥破薊州 接

伴賀正旦使吏部員外傳察為金人所殺 壬寅金

國使副王介儒撒离柁至太原又以牒文至代州茄

越寨詞極不遜 乙巳童貫自太原逃歸 郭藥師

叛執安撫使蔡靖都轉運使呂頤浩副使李興權提

舉沈瑄等迎降金人藥師叛報至京師上左右不欲

人聞知乃共匿其報但曰藥師被圍耳方議封藥師

燕王張令徽郡王割燕地與之使之世守云 丙午

十朝綱要 卷十八
幹离不至燕山郭藥師率官僚郊迎之闍母國王以
蔡靖及廉訪使者梁統留燕京差軍官部呂頤浩李
與權沈瑄以行 辛亥幹离不引兵向關以郭藥師
為先驅 壬子集從官赴都堂問計策 詔遣內侍
威武軍節度使梁方平將御前兵守瀋州 乙卯幹
离不攻保州安蕭軍不克黏罕引兵圍太原敗朔州
守臣孫翊于城下翊戰數日五兵皆盡遂為金人所
殺 丙辰手詔罷應于興作等事 戊午降制皇太
子為開封牧 御筆神霄宮除元手詔撥賜田外並

還元未去處道錄道官品等一切依元豐法 罷良
嶽官吏 罷修蕃衍北宅 是日金人圖中山府詹
度禦之己未降詔罪己令天下方鎮郡邑守令各率
師募衆勤王罷道官及大晟府行幸局西城及諸局
所管緡錢盡付有司 保和殿學士宇文虛中為河
北河東宣諭使 保靜軍節度使种師道為河北江
東制置使兼都統制馬步都虞候王管步軍司事何
灌副之 昭慶軍節度使知熙州姚古為京畿輔郡
兵馬制置使兼都統制戶部侍郎王蕃副之命陝西

路轉運判官李鄴借給事中使金人諭以將內禪且
求和 庚申上禪位于皇太子手詔以道君號退居
龍德宮 鄆王楷罷提舉皇城司 辛酉上始御崇
政殿 壬戌大赦 立皇后朱氏 是日金人攻慶
源府太史占帝星復明怪之已而聞天子內禪軍中
大驚欲回郭藥師曰南朝未必有備不如姑行 癸
亥詔遣何灌將兵二萬同梁平方守濬州河橋 甲
子太學士陳東上書乞誅蔡京王黼童貫梁師成李
彥^和朱勔六賊 是日金人陷德信府 圍太原府

乙丑召太常少卿李綱對于延和殿翌日除兵部侍
郎 丙寅上道^宗皇帝號曰教主道君太上皇帝
詔改來年元

皇宋十朝綱要卷第十九

眉山李壘編

欽宗恭文順德仁孝皇帝諱栢徽宗長子母曰顯恭皇后王氏元符三年庚辰歲四月十三日生於坤寧殿是年七月賜名亶授檢校太尉山南東道節度使封韓國公建中靖國元年六月遷興德軍節度使開府儀同三司進封京兆郡王崇寧元年二月改賜名烜十一月改今諱大觀二年正月遷司空武昌軍節度使進封定王政和三年正月加太保五年二月立為

皇太子宣和七年十二月除開封收是月二十三日
即位年二十六靖康二年四月北狩建炎元年五月
遙上尊號曰孝慈淵聖皇帝紹興三十一年五月十
九日崩諱始至臨安以其日為忌日年六十一七月
上尊謚曰恭文順德仁孝廟號欽宗

年號一

靖康

皇后一

仁懷皇后朱氏 故少傅恩平郡王伯材之女政和
六年六月納為皇太子妃七年十

皇子

月生嫡皇孫 諱宣和七年十二月立為皇后 靖康
二年四月從欽宗北狩 慶元四年三月十五日禮
官奏請用唐睿真皇后尋訪理
絕故事為位發喪追上今謚

皇太子 諱

政和七年十月丙辰生 賜名重和元年
正月戊子封為崇國公 崇德軍節度使

尋罷宣和二年六月改為高州防禦使 靖康元
年正月壬午拜檢校少保昭慶軍節度使 封太
寧郡王 四月癸卯立為皇太子 二年正月如青
城四月庚申從欽宗北狩

尚書右僕射 一人

靖康元年閏十一月詔三
省長官並依元豐旧制

何 稟

太宰 四人

十月 綱要

卷十九

二

白時中

李邦彥

張邦昌

徐處仁

少宰三人

張邦昌

吳敏

唐恪

門下侍郎四人

吳敏

耿南仲

何臬

趙野

中書侍郎六人

張邦昌

王孝迪

唐恪

徐處仁

何臬

陳過庭

尚書左丞四人

趙野

蔡懋

耿南仲

馮澥

尚書右丞七人

宇文粹中

李綱

李棡

何臬

陳過庭

王寓

孫傅

知樞密院事三人

吳敏 李綱 馮澣

同知樞密院事八人

李綱 以右丞兼 蔡懋 李栻

神師道 唐恪 許翰

聶昌 孫傳

領樞密院事二人

童貫 蔡攸

簽書樞密院事六人

耿南仲 路允迪 宇文虛中

李回 曾輔 張叔夜

使相三十三人

皇叔祖仲理 皇叔祖仲忽 皇伯孝騫

皇伯孝參 皇弟杞 皇叔侯

皇叔偲 皇弟楷 皇弟樞

皇弟植 皇弟栩 皇弟棫

皇弟模 皇弟榛 皇弟握

皇弟朴 皇弟棣 皇弟桴

皇弟栻 向宗良 錢景臻

皇弟楫

皇弟栻

蔡京

童貫

王宗渙

蔡攸

鄭紳

王憲

王薦

劉宗元

梁師成

高俅

學士七人

吳玠

莫俦

許翰

何臬

梅執礼

翟汝文

王寓

給事中六人

王寓

許翰

孫傅

楊特

譚世勳

安扶

中書舍人十三人

鄭滋

唐重

韓駒

顏岐

安扶

許景衡

晁說之

劉珏

胡安國

孫覲

李擢

李會

張激

御史中丞七人

陸德先

許翰

陳過庭

李回

呂好問

徐秉哲

曹輔

諫議大夫九人

謝克家

唐重

楊時

馮澥

呂好問

徐秉哲

曹輔

洪芻

范宗尹

諫官十四人

左右司諫
左右正言

李光

陳公輔

李會

呂好問

師驥

徐秉哲

崔鷗

許景衡

程瑀

趙暘

李擢

秦檜

元當可

徐宗古

御史二十七人

侍御史
監察御史

殿中侍御史

鄭滋

李擢

柳約

曹輔

孫覲

藺中謹

徐秉哲

章思永

李光

余應求

范宗尹

秦檜

張激 黎確 胡舜陟

胡唐老 唐恕 齊之礼

姚舜明 王侯 宋齊愈

馬伸 晁貫之 陳述

吳給 元當可 張所

誕節

乾龍

神御殿

瑞慶

欽宗

丙午靖康元年 金國主吳乞買天會四年

正月丁卯朔詔中外臣庶實封言得失 金人犯相

州 戊辰犯濬州梁方平何灌師潰退保滑州 金

人陷濬州己巳灌奔還金人乘舟濟河 下詔親征

詔悉除去擾民害物之事 又詔自今除授黜陟

並遵祖宗成法 省内外官司局務一百五處 放

寧遠軍節度使朱勗歸田里 賜安德軍承宣使李

彥死仍籍其家貲 責授太傅楚國公致仕王黼散

官安置永州 詔以知樞密院事吳敏為行營副使
兵部侍郎李綱顯謨閣直學士聶山為參謀 是夕
道君皇帝夜出通津門東巡皇后及皇子帝姬皆行
命平涼軍節度使太一宮使范訥統勝捷軍扈從
庚子宰執奏事未退詔引李綱入對請固守京城擢
為尚書右丞東京留守以同知樞密院事李梈副之
辛未命綱為親征行營使 白時中罷為觀文殿
大學士中太一宮使少宰李邦彥進太宰門下侍郎
張邦昌為少宰 詔六尚局依祖宗法 癸酉金人

幹离不軍至京城西北屯牟駝山岡天駟監謂南朝
若以一二千人守河我輩豈得度哉 遣尚書駕部
員外郎鄭望之使金軍為計議使以康州防禦使高
世則副之 是夕金人攻宣澤門 甲戌金人遣吳
孝民來議和 詔遣同知樞密院事李梈等與望之
世則等使金軍 乙亥金人攻通天景陽門甚急李
綱督將士拒之又攻陳橋封丘衛州門綱登城督戰
自卯至未申殺賊數千乃退何灌出戰敗績死之
金人又遣王油蕭三寶奴來索金五百萬兩銀五千

萬兩馬萬匹表段百萬匹欲尊其國主為伯叔割太原中山河間三鎮以河為界并以親王宰相為質乃退師李邦彥請如虜約上許之始差官根括金銀丙子避殿減膳 詔諭中山太原河間守臣交割地土與金國 命皇弟太保遂安慶源軍節度使康王使金軍以少宰張邦昌副之庚辰始行 辛巳道君至鎮江 金人陷陽武縣知縣蔣興祖死之 甲申詔批降處分雖係御筆並作聖旨行下 罷廉訪使者官復置走馬承受公事依祖宗法 是日統制馬

忠以京西募兵至擊金人順天門外斬獲甚衆 統制范瑗自京東來營於馬監王師稍振 乙酉遣僉

書樞密院事路允迪使河東粘罕軍 丁亥河北河

東路制置使种師道武安軍承宣使姚平仲督涇原秦鳳兵入授是日至關下詔以師道為同知樞密院事京畿河北河東宣撫使姚平仲為宣撫司都統制种師道分兵為兩寨一屯城西南一屯城東北開陳州宋門通都人出入戰於板橋至夜焚馬監東廊金人始懼 庚寅知開封府聶山遣人追殺王黼于雍

邱取其首以獻 癸巳李綱种師道姚平仲同對福
寧殿綱奏金人以孤軍深入正猶虎豹自投檻穽中
不可與角力以計取之必勝之策也上然之 甲午
太學生陳東上書乞先誅蔡京等六賊 乙未責授
少保淮南節度使梁師成散官行至八角鎮賜死
二月丁酉姚平仲夜率步騎萬人劫金人營未至一
里大呼而進既入虜營皆空虜縱鐵騎兩旁夾擊擁
平仲兵入護龍河溺死者十八九李綱率兵出救戰
於幕天坡虜復犯中軍綱親率將士以神臂弓射却

之上初滿意平仲必成功已而失利宰執臺諫交言
西兵勤王之師及行營司兵為虜所殲無復存者上
大驚於是罷綱以同知樞密院事蔡懋代之 己亥
金人復遣使來議和 辛酉資政殿大學士宇文虛
中使金軍以知東上閣門事王球副之持割三鎮詔
書以行 陳東率生及都民數萬人伏闕上書乞復
李綱及种師道位殺內侍數十人欲毆擊太宰李邦
彥邦彥疾驅乃免上乃詔李綱復為尚書右丞京城
四壁守禦使時師道實不罷盖外議流傳之妄云

罷內侍守城者 壬寅追封范仲淹魏國公贈司馬
光太師張商英太保 除元祐黨籍學術之禁 詔
賜太學生張炳雷觀並同進士出身為秘書省正字
尋改太學博士 金人求上母弟為質命皇弟肅王
樞使金軍以著作佐郎沈晦從之 乙巳再遣宇文
虛中王球使金軍就迎康王 即日還初入城都人
夾道懽呼 丙午金人圍京城凡三十二日是日始
退師 戊申大赦 下詔奉迎上皇 遣王球使金
軍迎肅王 己酉省殿中監及符寶郎 罷宰執兼

神霄玉清萬壽宮使 庚戌李邦彥罷為觀文殿大
學士中太一宮使少宰張邦昌進太宰知樞密院事
吳敏為少宰 辛亥詔監察御史言事依祖宗法
壬子立內侍寄資轉出換官法自今轉至武功大夫
止 癸丑金人皆渡河北去种師道罷為中太一宮
使 贈右正言陳瓘為右諫議大夫 侍御史孫覲
等連上疏論蔡京蔡童貫等罪惡 甲寅責授京散
官致仕居住河南府貫左衛上將軍致仕居住池州
蔡攸降太中大夫提舉亳州明道宮 乙卯御史中

一 朝綱要 卷十九
丞許翰言保和殿大學士孟昌齡延康殿學士孟揚
龍圖閣直學士孟揆父子相繼領水衡職二十年過
惡山積昌齡首建三山之策回大河之勢漂沒生靈
無慮萬計詔並落職外祠 督王球詣金軍迎肅王
金人攻太原久不下適平陽守將劉嗣初劫漢口
義兵以城叛歸虜權威勝軍事李植亦以城叛遂引
金人入南北關陷龍德府殺知府張確上命統制郝
懷將兵二萬屯河陽扼太行之險 丁巳責朱勔居
住衡州 己未道君皇帝發鎮江府 辛酉梁方平

伏誅 遣給事中王雲馬軍都指揮使曾勝使金軍
詔种師道為河北宣撫使駐滑州殿前副都指揮
使姚古為河北制置使馬軍副都指揮使种師中副
之古總兵援太原師中援中山河間府 道君皇帝
次揚州 壬戌以四月十三日為乾龍節 乙丑金
人犯澤州 資政殿大學士蔡備等七人並落職蔡
條換深州防禦使

三月丁卯朔遣徽猷閣待制宋暎奉表道君皇帝行
宮 三鎮兵民雖得詔不肯割地與金人戊辰吳敏

又言弃民於夷狄以存宗社恐無可存之理遂定計
不弃三鎮 己巳太宰張邦昌罷為觀文殿大學士
中太一宮使中書侍郎徐處仁為太宰 癸酉命門
下侍郎趙野為道君行宮奉迎使 丙子改擷景園
為寧德宮以居 太上皇后 癸未遣知樞密院李
綱迎候道君皇帝于南京 甲申道君至南京 金
人過中山府不攻城而去 乙酉上迎道君皇后放
宜春苑后入居寧德宮 丁亥上朝於寧德宮 庚
寅姚古復隆德府 辛卯復威勝軍 壬辰流星出

紫微垣 甲午命陳東為迪功郎賜同進士出身除
太學正東辭不拜 詔籍朱勗家資勗安置廣南

丙申責授蔡京為散官安置德安府攸令前去省侍
遣刑部尚書李弥大宣撫河北 是月夏人由金

肅河清軍渡河取天德雲內武州及河東八館

四月戊戌夏人陷震威城知城事朱昭死之 己亥
上迎道君皇帝於迎春苑奉道君皇帝入居龍德宮

壬寅上朝於龍德宮 癸卯立太學群王諶為太子

戊申置詳議司 詔陝西河東帥臣措置弓箭手

壬子韓禹不以三鎮未下遣賈寔冉企來議 癸丑移蔡京安置衡州童貫責散官安置郴州 朱勔羈管韶州子汝賢居住全州 詔令吏部稽考庶官凡由楊戩李彥之公田朱勔之應奉童貫西北之師孟昌齡河防之役夔蜀湖南之開疆閩陝河東之改幣及近習所引獻頌可采及特赴殿試之流所得爵賞悉奪之 甲寅詔种師道為河北河東宣撫使同知樞密院事 丙辰姚古與粘罕戰於閩南敗績退保隆德府 己未復詔科舉依祖宗法以詩賦取士

禁用莊老及王安石字說 辛酉詔今後孟享罷更不帶過宮觀 追復吕公著韓維范純仁吕大防等舊官職 壬戌詔臺諫官為天子耳目之官當出親擢宰執勿得荐舉 乙丑移蔡京安置韶州童觀英州朱勔循州蔡攸責授散官安置永州京勔子孫分貶湖南

五月戊辰詔追奪王安石王爵罷配享孔子廟 庚午減罷后妃帝姬宮教授 壬申移蔡攸安置潯州种師道駐兵滑州以老病旬罷初師中被詔進兵

由井陘道與姚古相犄角救太原師中次平定軍復
壽楊榆次諸縣時粘罕以畏暑度涇歸雲中覘者以
為兵散將歸朝廷信之同知樞密院事許翰從中督
戰無虛日詔書責以逗撓師中讀詔曰逗撓兵家大
戮也吾老矣忍以此為罪乎 丁丑戰與榆次右軍
先却虜勁卒直犯中軍諸將皆望風潰去師中赴敵
墜崖而死 丙子以李綱為河東河北宣撫使綱力
辭不拜後十日始受命 壬午尚書省上六曹以例
決事法 癸未遣給事中王雲使翰離不軍以曹朦

副之 甲申罷詳議司 詔遣官往陝西募兵二萬
人 庚寅詔立閣門官員額 辛卯詔遣官往福建
路募槍杖手 乙未姚古與金人戰於盤陀兵敗遁
還隆德府

六月丙申朔詔河北諸路召募弓箭手 辛丑詔河
北制置使劉韜為河北河東宣撫副使制置副使解
潛升為河北制置使治兵開德府韜屯達州潛屯威
勝軍都統制折可求張思正與陝西路轉運使張灝
屯汾州 丁未降詔蔡京變亂舊章挾紹述之名為

劫持之術尚慮邪說行習熟見聞搖動衆心害於國體有一於斯必罰無赦 庚戌詔令陝西諸路募兵備禦夏人 庚申燕餞李綱於瓊林苑 辛酉罷都水將作監丞受內侍官 李綱斬西熙河路都統制焦安節于瓊林苑 壬戌責河東制置使姚古授散官安置廣州 責孟昌齡子揚揆並授散官昌齡安置江州揚池州揆撫州 籍揚戩家貲 慧出紫微垣 癸亥責提舉嵩山崇福宮蔡懋散官居住亳州 是夏粘罕復奪夏人所割河東八館 金人始

建元帥府

七月己丑朔移孟昌齡安置袁州揚全州揆永州

辛未詔止四川福建湖廣等路起發將兵 詔前此

欲懲革濫賞十餘事然歲月已久真為混殺難以究

治可更勿問 壬申移昌齡安置封州揚連州揆賀

州 追奪揚戩使相 甲戌詔外州軍遇帝后忌止

於佛寺行香更不設位 乙亥除元符上書邪等之

禁 移蔡京安置儋州攸雷州 童貫安置吉陽軍

乙酉詔蔡京子操_孫二十三人已分竄湖南江西遠

地自今遇有大赦更不量移是日京死于潭州 初
勝捷軍統領張思正率兵救太原戰敗兵潰遁歸宣
撫使李弥大遇之於大名執師正斬之餘兵皆逃去
其將李福復帥衆為亂肆掠淄青之境從之者至四
萬人丙戌弥大遣裨將韓世忠敗之於臨淄河臨陣
斬福首追北至宿廷衆猶萬餘世忠單騎入其軍悉
降之 庚寅詔諸路走馬承受並依祖宗法帶某路
某司走馬承受 移蔡條白州蔡行郴州 丁亥詔
侍從官與議改脩宣仁皇后諱史 辛卯遣監察御

史張澂誅童貫廣西轉運副使李昇之誅趙良嗣並
函首赴闕竄其子孫于海南癸巳金人擊戰解潛于
南関 李綱至懷州劉韜兵先進金人併力禦之韜
兵潰將領王彥戰死

八月丙申復命宣撫使种師道巡邊召綱還 庚子
以星文變異避殿減膳詔侍從條上民間疾苦 癸
卯解潛駐兵南関金人襲破之師潰潛與數十騎遁
走中山 丁未幹离不復入寇攻廣信軍保州不克
遂寇安定 折可求率兵擊金人於子夏山師潰

張思正引兵出汾州衆十七萬戊申夜襲金人於汶
水餘斬首數百級己酉復戰虜以鐵騎直衝我師大
敗蹂踐而死者數萬人坑谷皆滿思正收餘卒奔汾
州 甲寅遣宗正少卿宗澤使幹离不軍太常博士
李若水使粘罕軍 乙卯又遣禮部尚書王雲使金
國以閤門舍人馬識遠副之 己未太宰徐處仁少
宰吳敏並罷為觀文殿大學士處仁知東平府敏知
揚州 中書侍郎唐恪為少宰 庚申又遣王雲使
幹离不軍以曹矜副之許三鎮稅賦之數 始粘罕

久攻太原不下乃於城外築舊城居之號元師行府
己而歸雲中留銀珠大王攻城至是粘罕復至自雲
中乘勝急攻太原九月丙寅陷之執安撫使張孝純
副都總管王稟死之太原自去年十二月乙卯受圍
凡二百六十日城中軍民飢餓死者十而八九固守
不下至是始破 壬申詔責吳敏授散官安置涪州
移蔡攸安置萬安軍尋與弟偁及朱勳俱賜死
癸酉責前知燕山府朝議大夫王安中散官安置隨
州 癸酉移臨江軍 丙子又移象州 譚稹安置

昭州 戊寅李綱罷為觀文殿大學士知揚州 丙
戌建三京及鄧州為都總管府分總四道兵 丁亥
詔李綱提舉洞霄宮 庚寅又詔落職 以北京留
守趙野西京留守王襄知鄧州張叔夜知應天府胡
直孺為四道都總管以龍圖閣待制知襲慶府顏岐
徽猷閣直學士張果貴州刺史高公純直龍圖閣知
海州朱勝非副之 壬辰种師道駐河陽知金人必
大舉上疏請幸長安以避其鋒朝廷以為怯召還病
不能入見以劉韜代之

十月癸巳朔責李綱授散官安置建昌軍 丁酉金
人陷真定府執安撫使李邈都鈐轄劉靖死之 戊
戌金人遣楊天吉王汭來 庚子金人陷汾州知州
事張克戩兵馬都監賈亶死之 壬寅又陷威勝軍
執知軍張堯佐 癸卯召涪陵人譙定赴闕 丙午
集從官議三鎮弃守仍下哀痛詔 金人陷平定軍
粘罕自太原斡离不自真定至平定會議再犯京
闕 初金人遣蕭倫來催所許金帛徐處仁吳敏與
光祿少卿館伴使邢諒等謀陰誅倫令持書結余堵

倫陽許之甫過河即以白粘罕故金人以為詞舉兵
深入 丁未高麗入貢 庚戌以金吾上將軍提舉
亳州明道宮范訥為河北河東宣撫使 辛亥王雲
至真定遣人報金人已不復議割三鎮止索^五輅冠
冕及上尊號且須康王來和好乃成 壬子命康王
使幹离不軍 癸丑金人陷隆德府執知府張友極
丙辰越回牛嶺又陷平陽府 庚申移李綱安置
夔州 辛酉神師道卒
十一月^壬戌金人陷澤州知州高世由以城降 丙

寅籍譚稹家資 夏人陷懷德軍知軍劉銓通判杜
翊世死之 戊辰王雲至自虜中言虜議中變欲得
三鎮不則進兵取汴都已已集百官議割三鎮于延
和殿各給筆札右諫議大夫范宗尹等七十餘人乞
與之惟戶部尚書梅執禮兵部尚書孫傳吏部侍郎
吕好問左司諫秦檜等三十六人乞不與 癸酉金
人至河外宣撫副使折彥質領兵十二萬拒之 甲
戌師潰金人長驅濟河知河陽燕瑛西京留守王襄
皆棄城去粘罕遂陷河陽西京王雲固請康王將命

乙亥詔王雲副康王使幹离不軍許割三鎮并奉宸
冕車輅仍尊其主為叔上尊號十八字以中書舍人
耿延禧觀察使高世則為參議官 丙子金人遣使
王汭來以畫河為言陞對殊不遜於是再遣資政殿
學士馮澥徽猷閣學士李若水使粘罕軍 丁丑防
河使李回率眾遁還 己卯康王至濬州庚辰至相
州 庚辰龍衛兵郭京自言能用六甲法可以生擒
二酋同知樞密院孫傅深信之命以官賜金帛數萬
使自募兵得萬二千人 壬午康王至磁州磁人殺

王雲止王勿行 癸未王復還相州 遣門下侍郎

耿南仲使幹离不軍同知樞密院事聶昌使粘罕軍
分割兩河之地昌次絳州絳人不奉詔聚眾梓昌下
馬屠裂而死 金人遣王汭揚天吉撒离母持誓書
來 乙酉幹离不軍至城下丙子統制范瓊率兵屯
陳州門外禦之 戊子金人攻通津門瓊出焚虜營
金人再遣揚天吉來議和 己丑張玠夜將勤王
之兵三萬至闕 金酋幹离不又遣劉晏來議和晏
請上出城會盟 庚寅詔三省長官名悉依元豐旧

制改太宰少宰復為尚書左右僕射 少宰唐恪嘗
勸上西京洛京還據秦雍以圖興復門下侍郎何棗
詆其不然上決意守城都人遮擊恪、避之得免遂
卧家不起

閏十一月壬辰朔恪罷為觀文殿大學士中太一宮
使棗為右僕射 癸丑金人攻通津門甚急用日者
王俊民言迎土牛借春至日益張青旗以應木德仍
自東壁始都人疑統制官辛亢宗叛應虜故易旗幟
於是聚數千人趨東城擒亢宗及其子殺之 粘罕

軍至城下 甲午驛台李綱復其官以為資政殿大
學士領開封府 金人陷懷州知州霍安國通判林
淵等死之 乙未金酋粘罕遣蕭慶等四人來 金
人攻朝陽門 丙申金人陷拱州 戊戌金人復遣
蕭慶來 己亥金人攻通津門善利門甚急 庚子
金酋粘罕復遣蕭慶來議和且貸糧慶堅請上出城
會盟乃詔都水監丞李處權閤門宣贊舍人吳德冲
為報謝使 命張玘夜為簽書樞密院事引所部兵
入城同知樞密院事孫傅措置四壁 癸卯張叔夜

與范瓊分兵襲金人營不克 是夜雪作 甲辰大雪 金人陷亳州 乙巳金人攻城愈急拾城下矢石反射城上樓櫓悉為所壞 二酋復遣蕭慶來言更不須上出城只要大臣計議親王為質慶要何棗出城棗色變上亦不許 丙午大雪 遣尚書左丞馮澥僉書密院事曹輔宗室士誥使金軍 己酉命康王為天下兵馬大元帥以延康殿學士知中山府陳過祕閣修撰知磁州宗澤集英殿修撰汪伯彥副之 辛亥金人再遣使來趣親王出盟 壬子復遣

澥輔及士誥使金軍既至金人即送澥等歸不交一談必欲親王及何棗至自此攻城益急 甲寅大風自北起俄大雨雪連日夜不止何棗趣郭京以六甲兵出戰兵敗京遁去 乙卯金酋再遣劉晏來趣親王宰相出城 丙辰虜擁兵登城京城自十一月十五日受圍凡四十日是日午時陷 虜焚南薰宣化諸門統制姚友仲戰歿京城四壁守禦使劉延慶與其子光國奪門出奔為追騎所殺是日都人率眾直入都亭驛擒劉晏等殺之 丁巳遣何棗副濟王栩

為請命使 戊午又遣稟與鄆王楷詣金軍 辛酉
上如青城

十二月壬戌康王開大元帥府於相州 癸亥上至
自青城 甲子金人來索金銀繅帛詔開封尹王時
雍徐秉哲分東西廂督括 乙丑尊元祐皇后為元
祐皇太后 丙寅命中書侍郎陳過庭資政殿學士
劉韜 州防禦使折彥文使兩河割地遣僉書樞密
事曾輔同金使往迎康王回京 乙亥王如北京時
京城圍久不通四方事皆取決於王 砥相劇賊常

景楊青各以衆來降 丙子遣祠部員外郎惠柔民
部絹一千萬足納金人軍前 丁丑王次北京 壬
午宗澤率兵至大名乞進援京師汪伯彥沮之澤請
自進兵至都城從之 金人遊騎犯蔡州知鄂州崇
陽縣李洵率所募兵六百人遇之洵挺身力戰死之
乙酉虜來促犒軍物命王時雍徐秉哲等十四人分
諸壁受納 庚寅康王如東平府

丁未靖康二年

金國主吳乞買天會五年

正月癸巳始曾輔奉詔迎康王輔還稱不知王所在

壬辰金人始聞王在開德趣迎康王還京遣中書舍人張澂持詔以行 康王次東平府 庚子上復如青城 皇太子監國以同知樞密院事孫傳為太子少傅仍為晉守 壬寅北道總管趙野與河東北路宣撫使范訥合軍南京號宣總司 乙巳差侍從郎官二十四員再分括金銀 籍梁師成家資 丙午太學生徐揆以書達二首請上還闕為二首所殺 河北河東路宣撫使劉韜縊死於虜營 己酉開封府括到金十七萬八千兩銀六百萬兩表段一百

萬疋納金人軍前 丙寅翰林學士承旨吳玠吏部尚書莫儔自虜營持虜詔入城令百官軍民推舉異姓仍邀太上皇出城孫傳等讀詔號慟即以狀懇請乞立趙氏連日具狀申懇虜以非其主本意却之 丁卯道君皇后如青城鄆王以下三十餘人皆從 庚午玠儔復至督舉異姓催取皇族且云粘罕大怒云明日二事不了便舉兵屠城 辛未皇后太子如青城百官定議舉張邦昌吏部尚書王時雍先書名以率百官唯張叔夜孫傳不書議狀御史中丞秦檜

亦不書別具狀乞存趙氏 壬申金人取傅及叔夜
往軍中 乙亥金人又取檜及太學生三十人 庚
辰康王如濟州 辛巳吏部侍郎李若水數粘罕五
罪罵不已遂遇害 壬午金人陷淮寧府知府事向
子韶死之 先是金人取藥工醫人等至軍前各言
有窖藏金銀乞遣人撥取二首大怒謂城中尚有藏
匿復大索城中癸未復以金七萬五千八百兩銀一
百十四萬五千兩表段四萬八千四百疋納軍前
康王次濟州 唐恪已書立張邦昌狀仰藥而死

乙酉金人以金銀不足殺提舉官戶部尚書梅執禮
等四人杖侍御史胡舜陟等四人 丁亥知中山府
陳遇為其部將沙振所害戊子咸寧宮火元祐皇太
后出居私第

三月丙申親事官殿班吳革等謀起議於通津門范
瓊詐與通謀捕革斬之 丁酉金人以偽詔脅立張
邦昌為皇帝國號楚御紅繖紅袍玉帶 壬寅邦昌
偽詔內外官司稱面旨中旨宣旨 乙亥邦昌如青
城致謝二首 乙酉金人陷復州 辛亥金人命明

珠勃莖為河北統軍屯澹州阿高勃莖為河東都統
屯河陽 癸丑金人歸馮懌曹輔譚世勣孫覲王藻
徐天民蘇餘慶郭仲荀沈晦黃夏卿唯拘何棗孫傅
張叔夜秦檜司馬朴等北去 丁巳道君皇帝北狩
幹离不護送由滑州道進發 戊午金人兵始下城
己未永興經略使范致虛率兵與金人戰於潼關
克之遣兵馬鈐轄翟進復西京斬偽尹高世由張友
極

四月庚申朔上北狩粘罕護送由鄭州道進發 江

寧府軍校周德等率眾叛執知府宇文粹中殺通判
王章兵馬鈐轄王宗韓并曹掾官七人嬰城自守
辛酉邦昌降手書肆赦是夕虜營始空 壬戌知淮
寧府趙子崧知穎昌府何志同荆浙江淮經制使翁
彥國等築壇歃血誓戮力合謀共安王室 甲子奉
迎元祐皇太后入居延福宮 乙丑邦昌始不坐迎
陽門於內東門聚三省密院議事 康王遣使齎手
書至湖北尋訪李綱 丙寅邦昌遣使以咨目上康
王大略言國禍之酷權以濟事故寧忍死報之於陛

下丁卯邦昌遣禮部侍郎謝克家齎玉璽赴大元
帥府戊寅元祐皇太后遣姪衛尉少卿孟忠厚尚
書左丞馮澥右丞李回奉書迎康王庚午太后始
御內東門小殿垂簾聽政邦昌以冢宰退處資善堂
僭位號凡二十三日庚辰康王如南京命廊延
副總管劉光世為大元帥府提舉五軍癸未至南
京甲申元祐皇太后遣吏部尚書王時雍開封尹
徐秉哲奉乘輿服御中書舍人李擢孫覲奉傳國寶
至邦昌繼至伏地慟哭請死丁亥金人陷陝州五

月朔康王即位於南京

十稔紀要

卷廿九

三

Vertical lines for writing text, currently blank.

Large watermark seal: 國子監

